

Vivian Lampe:

“Padu, mi tata, mi inspiracion y mi confidente”



VIVIAN Lampe, carinosamente yama Fichi, ta e unico yiu di Juan Chabaya “Padu” Lampe y Daisy Lampe-Croes. Den un entrevista cu Vivian, nos a repasa su infancia, su hubentud, su bida actual y e recuerdonan agradabel di cada epoco di su bida cu su tata Padu. Pa Vivian, Padu no t’e artista admira pa miles di hende, pero mas bien t’e tata cu a mim’e durante su infancia, cu a proteh’e durante su hubentud y a gui’e durante e periodo delicado di su adolescencia y ta su confidente te dia di awe.

Padu no solamente ta un musico supertalento, pero e ta tambe un pintor reconoci y un gran autor di bukinan encuanto metafisica. Padu a skirbi tres buki riba e tema aki. Vivian ta conta con el a lanta den cas mirando Padu den su oranan liber ta lesa, pinta, ta toca piano y ta compone canticanan. Padu tin un tesoro na obranan musical pa cual el a skirbi e letranan y e musica. Un compositor tur afo.

Padu ta un homber cu un talento unico. Asina el a compone masha hopi bunita wals di cua esun mas conoci sin duda ta “Abo so” y un granel di canticanan di mucha. “Toloichi” ta un di nan.

Aña pasa (2008 Red.) Ivan Quandus hunto cu Johny Scharbaai a traha un CD riba cua e cantica aki, Toloichi, cu ta bay encuanto un cacho chikito, ta wordo canta. Un otro cantica conoci “E pato” tin e letranan di Ellis Juliana, pero e musica ta di Padu. Un cantica sin duda masha acogedor. Pa su casa Daisy, Padu a compone un wals instrumental yama “Daisy”. P’e yiu mayor di Vivian, Urvin su prome nieto Padu a compone un bolero “Sonrisa di un baby” y pa su nieta Sonia el a compone un wals “Carmen Sonia” y pa Vivian mes tambe Padu a skirbi un wals instrumental “Vivian”.

Segun Vivian su yiu mayor Urvin a hereda e caracter suave di Padu. Padu indudablemente a nace cu un don musical grandi. Si el a lanta den un otro epoca e por a bay Conservatorium y por tabata awe un musico mas renombra ainda den tur skina na mundo. Asina mes mester menciona cu Padu ta un icono, e t’e unico persona cu a compone e himno di su pais y ta na bida ainda. E co-compositor di nos himno; Rufo Wever (tambe Hubert Booi: Red.) ya a bay laga nos basta tempo pasa caba. Desde mucha Padu por a toca piano sin nunca haya les. Ora cu el a crece y su mayornan a reconoce den nan yiu su talento y pasion pa musica nan a mande bay tuma les di paino cerca Juffrouw Shishi Rodriguez, pero ya di dos les e juffrouw di piano aki a bis’e cu e ta toca asina bon, cu e no mester bin les mas.

Padu, kende dus ta un autodidacto, a sigui riba su piano y a compone un cantidad grandi di cancion cu te dia di awe diariamente sea na Aruba of un otro caminda na mundo ta wordo toca. Vivian ta conta con su prome recuerdonan di su tata, t’esun tras di piano. E tabata dal cu su pianan riba e pedalnan di su piano masha duro mes pa duna e ritmo y pa co’i mala mucha Vivian a pone un bloki bou di su pia – p’asina e no por a sigui toca. Padu kende tin un caracter masha tolerante tabata hari p’e cosnan aki.

Naturalmente cu Padu no por a cria su famia tocando piano y componiendo musica. Esaki tabata su hobby y no

tabata un entrada. Ta pesey cu Padu tabata traha na ALM. N’e compania di aviacion aki Padu a traha mas di 20 aña. Di eynan el a bay cu pensioen. Prome cu ALM, Padu a traha otro caminda tambe. Den su tempo liber Padu sea su so of cu amigonan tabata skirbi e letranan pa cantica of traha compocisionnan.

Padu na basta ocasion a yega di toca den exterior tambe. Padu a toca piano y duna shownan rond mundo. Su shownan tabata masha gusta mes. Mas y mas e tabata wordo reconoci tambe rond mundo.

Ta pesey cu na Venezuela nan a dune e apodo “Padu del Caribe”. Un nomber artistico cu Padu tabata usa. Tambe den su show conoci na Tele-Aruba den añanan 60. E show aki cu tabata wordo yama “Show di Esso” a wordo presenta na aña 64 na Tele-Aruba. Ami mes tambe ta corda ora cu e show aki a wordo presenta pa prome bes na Tele-Aruba. P’e tempo ey sigur tabata algo revolucionario.

Padu tabata subi escenario rondona di mucha muherman jong cu shimis cortico of den badpak y nan tur tabata canta “Esso, Esso, Esso, Padu del Caribe y su show”. Vivian ta corda cu e show aki a dura tres aña y despues Tico Kuiperi a sigui cu e trend aki. Lamentabel ta cu no tin un show musical mas na television aki na Aruba manera esaki.

Segun Vivian e trabou pa hinca un show asina den otro tabata inmenso. Padu mes tabata produci e show, tabata busca invitadonan di Aruba y for di exterior y tabata toca y anima e show. Na Aruba Padu tabata e persona cu a marca paso riba e tereno aki.

Vivian ta corda con Padu tabatin un cantidad grandi di amigo cu e mesun pasion, esta musica. E inmortal y genio musical Rufo Wever tabata un di e amigonan aki. Hunto nan a compone na 1954 “Aruba dushi tera” cu despues a bira nos himno nacional.

E letranan di e prome dos couplet di e cantica aki ta di Padu y hunto cu Rufo Wever a traha e musica pe. Betico Croes a aserca Padu y a puntre si e ta haya bon pa usa e cantica aki cu ya tabata hopi conoci caba p’e bira nos himno nacional. Padu a haya esaki un honor grandi y asina “Aruba dushi tera” a bira nos himno y ta wordo toca na tur ocasion ceremonial.

E di tres couplet a wordo skirbi pa Hubert Booi (Red.). Padu hunto cu su gran amigo Rufo Wever tabatin un studio di grabacion cu tabata yama “Aruba Recording Company”. Ainda ta bibo den memoria di Vivian cu nan tabata toca hunto riba aña nobo y e jamsessionnan aki tabata dura te den oranan lat di atardi.

E prome cantica di nos Carnaval tambe ta di Padu y Rufo Wever. Hubert Booi ta un otro amigo di Padu. E cantica “Fiesta den cura” tin letranan di Hubert Booi y e musica ta di Padu. Asina e tin varios. E cu Hubert semper tabata bay bon cu otro. Segun Padu cu e letranan di Hubert riba nan mes caba ta melodico. Pa señora Belen Kock tambe Padu a traha musica pa su poesianan. Cu Maybelline Arends-Croes Padu tin un hopi bon relacion y asina por sigui.

Pa hopi hende Padu ta un inspiracion. Sigur tambe pa su yiu Vivian kende a hereda e talento musical di Padu y semper a gusta musica. Vivian ta toca piano cu masha entusiasmo y hunto cu su tata nan ta toca un quatermain titula “Estrellita del Sur”.

Nan tin hopi exito cu e cantica aki. Vivian kende ta cu pensioen a bisa cu awor cu e tin mas tempo e lo cuminsa bay les di piano atrobe pa refina su tocamento.

Riba e pregunta dicon Vivian nunca a bay studia musica el a bisa cu antes esaki no ta tabata echt un opcion. Aunke cu e tabata kier a haci esaki si. E tabatin dos pasion, musica y medicina. Ora cu el a bisa na cas cu e lo kier bay studia musica e idea aki a wordo bari for di mesa masha liher dor di su mama, kende no a mira un carera musical pa su yiu.

Segun Vivian, Padu mes nunca a bisa Vivian cu e no tabata mag di studia musica, pero no a encurashe tampoco. Vivian ta bisa cu si e por haci tur cos di nobo e lo a bay Conservatorium. Vivian su soño semper ta pa por dirigi un orkesta, pero e no a haya e sosten necesario na cas cu ta

comprendibel p’e tempo ey.

Vivian a bay Merca na 1962 cu apenas 15 aña y eynan el a studia cytologia (un studio riba celularnan). Eynan Vivian a conoce su ex casa, e conocido dr. Osvaldo Anaya. Na 1973 Vivian a regresa Aruba.

Cu Vivian tin talento ta obvio, pasobra for di su 6 aña e por a toca loke e tabata tende Padu toca. Ora cu Vivian tabata studiando na Virginia el a bay siña toca musica clasico pa algun aña. Pero, tempo cu Vivian tabatin mas o menos 12 aña el a cuminsa bay les cerca un dama Hulandes na unda el a haya e lesnan basico den musica.

Vivian ta conta cu su mama Daisy tabata superprotectivo cu ne. Semper bay Daisy tabatin miedo pa algo pasa cu ne y dor di esaki a prive di tin un hubentud manera otro mucha. Dor di e actitud protectivo aki Vivian tabatin den su tata un aliado y tabata acudi na Padu ora cu e tabatin algo di conta of puntra. Su tata a bira su confidente.

Vivian tabata por a papia tur cos cu su tata kende e semper a yama Padu. Vivian ta corda con tempo cu su mama tabata na bida ainda, tur diadomingo Padu tabata toca gospels p’e y Daisy tabata gosa esaki hopi.

E prome Pasco cu Padu a pasa sin e amor di su bida Daisy el a traha e cancion emocionante “Mi prome Pasco sin bo”. Daisy a fayece na november di aña 1994, e aña aki ta haci 15 aña y no ta pasa un dia cu Padu no ta corda riba dje y ainda tur diadomingo sagradamente Padu ta toca gospels den oranan di mainta. Daisy na unda cu e t’awor ta haya su concierto.

Algun cos cu Vivian kier comparti ta recuerdonan bunita di su infancia den cua su tata ta hunga e rol principal. Tempo e tabata mucha, den añanan 50, tabatin matinee tur diadomingo na “De Veer Theater” y e hunto cu su mayornan tabata bay eynan.

Pero, prome nan tabata pasa come un bon piska hasa na Trocadero. Prome cu e pelicula cuminsa Padu tabata entretene e publica sinta eyden. Vivian ta corda manera ta dia di awe con un biaha e tabata bisti cu un saya cora y a bay sinta den e publico hunto cu su mama, ora na cierto momento Padu a bin cerca dje, charge riba su brasa y bay cu ne riba stage pa hunto nan toca un piesa.

Un recuerdo masha grato mes pa Vivian kende a sinti su mes asina privilegia e momentonan ey. Mester remarca cu p’e temponan ey musica live prome cu un pelicula cuminsa tabata algo espectacular. Un otro recuerdo agradabel tabata ora Vivian hunto cu su mama a bay busca Padu na Aeropuerto bieu despues cu el a bin di Venezuela na unda nan e entreg’e un premio importante “Piano de Oro” cu por wordo considera manera un Grammy.

Ora nan a yega Aeropuerto tabatin un multitud grandi eynan. Hasta Gezagebber Felipito Tromp tabata eynan. Nan no por a pensa cu e hendenan a bin pa Padu y Padu bahando di avion mirando tur e hendenan tampoco tabata sa cu ta e nan a bin yama bon bini y felicite cu su premio. Ta ora cu nan a pone un krans di flor rond su garganta cu nan tur a haya sa cu ta pa Padu e hendenan a bin.

Vivian ta conta cu awe Padu ta u homber super ocupa. E ta wordo invita pa casi tur evento musical y cultural, na exposicion, aperturanan y ta trata di bay mas tanto posibel. Vivian ta spera di tin su tata hopi mas aña cu ne, pero no a bira asina.

Diahuebs, dia 28 di november 2019, Aruba a ricibi e triste noticia cu Padu, nos Tata di Cultura a bay sosega pa semper den brasa di nos Creador. Cu Padu, kende tanto a nifica pa nos, drumi dushi y trankil. Su bida na mundo tabata completo.

Forsa na Vivian, su casa Victor, yunan Urvin y Sonia y demas famia, amigo, admirador y conociman. Padu lo sigui biba den nos curazon pa semper, sigur tambe ora nos scucha nos Himno Nacional, e lo sigui biba den e canticanan cu el a compone, den e cuadranan cu el a pinta, e bukinan cu el a skirbi y den su amor profundo pa su famia y e ser humano en general.

Entrevista haci pa Myriam Tonk Croes